

**ՈՐՈՇ ԴԻՏԱՐԿՈՒՄՆԵՐ ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆՈՒՄ ՕՏԱՐԵՐԿՐԱՑՈՒՆ
ԺԱՄԱՆԱԿԱՎՈՐ ԿԱՑՈՒԹՅԱՆ ԿԱՐԳԱՎԻՃԱԿԻ ՏՐԱՄԱԴՐՈՒՄԸ ՄԵՐԺԵԼՈՒ ՄԱՍԻՆ
ՈՐՈՇՈՒՄԸ ԲՈՂՈՔԱՐԿԵԼՈՒ ԱՐԴՅՈՒՆԱՎԵՏՈՒԹՅԱՆ ՎԵՐԱԲԵՐՅԱԼ**

Օտարերկրացիների Հայաստանի Հանրապետություն մուտք գործելու, ՀՀ տարածքում գտնվելու, բնակվելու, տարանցիկ երթևեկելու, ելքի, ինչպես նաև Հայաստանի Հանրապետությունում օտարերկրացիների հետ կապված այլ հարաբերությունները կարգավորվում են «Օտարերկրացիների մասին» 25.12.2006թ. ՀՕ-47-Ն ՀՀ օրենքով (այսուհետ՝ Օրենք):

Օտարերկրացիները Հայաստանի Հանրապետությունում կարող են բնակվել, եթե ունեն Օրենքով սահմանված՝ ժամանակավոր, մշտական կամ հատուկ կացության կարգավիճակ: Ժամանակավոր կացության կարգավիճակը ՀՀ կառավարության լիազորված պետական կառավարման մարմնի թույլտվությունն է, որն օտարերկրացուն իրավունք է տալիս բնակվելու Հայաստանի Հանրապետության տարածքում որոշակի ժամկետով:

Օրենքի 15-րդ հոդվածի համաձայն՝ ժամանակավոր կացության կարգավիճակը տրվում է յուրաքանչյուր օտարերկրացու, եթե նա հիմնավորում է, որ գոյություն ունեն Հայաստանի Հանրապետության տարածքում մեկ տարի և ավել ժամկետով իր բնակվելը հիմնավորող հանգամանքներ: Օրենքը հստակ թվարկել է նաև այդպիսի հանգամանքների ցանկը:

Ըստ Օրենքի 17-րդ հոդվածի՝ ժամանակավոր կացության կարգավիճակ ստանալու համար դիմումը ներկայացվում է միգրացիայի և քաղաքացիության բնագավառում պետական կառավարման լիազոր մարմին՝ ՀՀ ՆԳՆ միգրացիայի և քաղաքացիության ծառայություն (այսուհետ՝ Միգրացիայի ծառայություն), որը ՀՀ կառավարության սահմանած կարգով դիմումը քննարկում է այն ներկայացնելու օրվանից 30-օրյա ժամկետում, և որոշում է կայացնում օտարերկրացուն ժամանակավոր կացության կարգավիճակ տալու կամ մերժելու մասին:

Օրենքի 19-րդ հոդվածով սահմանված են այն հիմքերը, որի դեպքում լիազոր մարմինը կարող է մերժել օտարերկրացուն կացության կարգավիճակ տալը: Մանավորապես, օտարերկրացուն կացության կարգավիճակ տալը կարող է մերժվել՝ եթե (...) կացության կարգավիճակ հայցելիս նա ներկայացրել է իր մասին կեղծ տեղեկություններ կամ չի ներկայացրել անհրաժեշտ փաստաթղթեր, կամ գոյություն ունեն տվյալներ այն մասին, որ նրա գտնվելը Հայաստանի Հանրապետությունում ունի այլ նպատակ, քան հայտարարվածը:

Այսպիսի իրավակարգավորումների պայմաններում տպավորություն է առաջանում, որ օտարերկրացուն ժամանակավոր կացության կարգավիճակի տրամադրման ողջ գործընթացն իրականացնում է Միգրացիայի ծառայությունը: Հետևաբար պրակտիկայում՝ որպես այդ հարցով վարչարարություն իրականացրած պետական մարմին, օտարերկրացուն ՀՀ-ում ժամանակավոր կացության կարգավիճակի տրամադրումը

մերժելու մասին որոշումները դատական կարգով բողոքարկելիս, այդ մարմինը ներգարվվում է որպես պատասխանող կողմ:

Սակայն, այս հարցով դատական ակտերի ուսումնասիրությունը ցույց է տալիս, որ օտարերկրացիներին ՀՀ-ում կացության կարգավիճակի տրամադրումը մերժելու մասին Միգրացիայի ծառայության որոշումների դեմ բերված բոլոր վարչական բողոքներն ու դատական հայցերը նույնպես մերժվում են:

Վարչական բողոքների և դատական հայցերի մերժման հիմքում դրվում է ՀՀ կառավարության 07.02.2008թ. թիվ 134-Ն որոշման (այսուհետ՝ Կառավարության որոշում) 2-րդ հավելվածի 2-րդ կետով սահմանված այն կանոնը, ըստ որի՝ ***օտարերկրացուն Հայաստանի Հանրապետությունում ժամանակավոր կամ մշտական կացության կարգավիճակ տալու հարցն անձնագրային և վիզաների վարչությունը համաձայնեցնում է ՀՀ Ազգային անվտանգության ծառայության հետ, որի հայտնած առարկության պայմաններում Միգրացիայի ծառայությունը չի կարող կրել հայցվող բարենպաստ վարչական ակտն ընդունելու պարտականություն:***

Այսպիսով, կատարված ուսումնասիրությունների արդյունքներով համոզվում ենք, որ Օրենքի 20-րդ հոդվածով սահմանված կացության կարգավիճակ ստանալու դիմումի մերժման որոշումը բողոքարկելու իրավունքը ձևական բնույթ է կրում և չի կարող պաշտպանել այդ իրավունքից օգտվող օտարերկրացուն:

Խնդիրը նրանումն է, որ ***թեև Օրենքով հստակ սահմանված է, որ օտարերկրացիների կացության կարգավիճակի հարցով վարչարարություն իրականացնող և որոշում ընդունող մարմինը Միգրացիայի ծառայությունն է, սակայն Կառավարության որոշմամբ հաստատված կարգի ուժով այդ վարչական մարմինը ինքնուրույն չի իրականացնում դիմումի քննություն և կաշկանդված է Ազգային անվտանգության ծառայության կարծիքով (համաձայնությամբ կամ առարկությամբ):***

Ընդ որում, ԱԱԾ-ի կարծիքի հիմքում դրված որևէ փաստ պատասխանողի կողմից չի ներկայացվում դատարանի քննությանը և գնահատական չի տրվում այդպիսի կարծիքի հիմանվոր կամ անհիմն լինելու հարցին: Ուստի նույնիսկ այն դեպքում, երբ Ազգային անվտանգության ծառայության կարծիքն ակնհայտ անհիմն է, միննույն է դատական ակտով ևս հաստատվում է, որ Միգրացիայի ծառայությունը պարտավոր է առաջնորդվել այդ կարծիքով և մերժել օտարերկրացուն կացության կարգավիճակ տրամադրելու մասին դիմումը:

Այսպիսով, Օրենքը մի կողմից Միգրացիայի ծառայությանը պարտավորեցնում է օտարերկրացուն կացության կարգավիճակ տրամադրելու մասին որոշում ընդունելիս առաջնորդվել Ազգային անվտանգության ծառայության կարծիքով, մյուս կողմից օտարերկրացուն իրավունք է տալիս վարչական կամ դատական կարգով բողոքարկել Միգրացիայի ծառայության որոշումը: Իրավունքի պաշտպանության այս մեխանիզմն ակնհայտ անարդյունավետ է, քանի որ բոլոր դեպքերում Միգրացիայի ծառայության ընդունած ակտի իրավաչափությունը հիմանվորվում է ԱԱԾ-ից ստացած բացասական

կարծիքով: Մինչդեռ օտարերկրացու կամ Միգրացիայի ծառայության համար սահմանված չէ ԱԱԾ-ի կարծիքի հիմքում ընկած փաստերին ծանոթանալու և դրանց դեմ առարկելու իրավական մեխանիզմներ: Ուստի, *մեր դիտարկմամբ, օտարերկրացու կողմից՝ իրեն կացության կարգավիճակի տրամադրումը մերժելու մասին Միգրացիայի ծառայության որոշման բողոքարկումը անօգուտ է և չի կարող համարվել օտարերկրացու իրավունքների պաշտպանության արդյունավետ միջոց:*

Հուլիս 2025թ.

Կատարող, իրավաբան՝
Նաիրա Ավետիսյան

«Ա.Դ.Սախարովի անվան մարդու իրավունքների պաշտպանության հայկական կենտրոն»
հասարակական կազմակերպություն, Կենտրոնական գրասենյակ (Երևան)